

“Paisahe Cu Cadushi Na Macuarima”

Obra nobo di Stan Kuiperi

Recientemente e maestro di arte y pintor profesional Arubano Stan Kuiperi a crea un obra di arte nobo den forma di un pintura titula “Paisahe cu Cadushi na Macuarima”.

For di añanan 1980 y 1990, anualmente Stan Kuiperi a crea coleccionnan di cuadro nobo cu a presenta den tur sala di exposicion na Aruba. Den e coleccionnan aki, tres tema semper a hunga un rol central: 1- E paisahe Arubano. 2- E cultura historico nativo. 3- E influencia di e ser humano riba e medio ambiente natural.

E paisahe Arubano ta ser representa den un estilo abstracto cu elementonan figurativo den un idioma visual personal y unico, pero semper reconocibel como paisahe local. E cultura nativo ta presente den forma di dibuhonan Caquetio, como mensahenan perdi den tempo.

E ser humano mes nunca ta presente. E paisahe ta testigo di desaparicion di hende pa motibo di descuido y abuso di naturalesa di planeta Tera.

E titulo ta inspira pa un potret di un cadushi largo existente na Macuarima, Santa Cruz, cu ta parti di un estudio di cadushinan rond henter Aruba for di añanan 2000. E cadushi largo, cu su apariencia mahestuoso y dominante, a bira un simbolo di e resistencia di naturalesa na Aruba, no obstante siglonan di segura y di maltrato di parti di ser humano.

E uso di espacio ta abstracto, y ta representa e paisahe di nos isla encera pa laman di tur banda. Elementonan cultural humano ta aparece y desaparece den e colornan y structura local di tera. E presencia fuerte di e color di oro ta simbolisa e energia divino (creativo), infinito y eterno cu ta yena nos universo, nos mundo y nos mes cu bida. Pues nos por mira elementonan di bida pasahero, pero tambe di speransa nobo den e paisahe simpel di nos isla cu ta escenario pa pasado, presente y futuro di humanidad.

Como ultimo, e obra ta duna indicacion di desaroyonan nobo den e trabou artistico di e pintor.

Stan Kuiperi ta un maestro di Educacion di Arte (MEd) cu a studia na Puerto Rico, Estadonan Uni, y na Hulanda cu un beca di StiCuSa di Hulanda.

Ela ricibi e diploma Eerste graads Bevoegdheid Docent Beeldende Vorming, un estudio mas amplio cu e Master's Degree cu Hulanda a adapta for di Merca añanan despues. Ela haya les di profesornan y artistanan-maestro renombra na Hulanda na Utrecht y na Tilburg. Esaki a forma un base di un conocimiento pedagogico-teoretico di arte hopi amplio, hunto cu un dominio diverso di tecnicanan di arte visual.

Despues di su estudio, ela biba 3 aña na Francia. Aki ela cuminsa su carrera profesional pa medio di exposicionnan



hopi exitoso na Francia y Hulanda, desaroyando su vision y estilo innovativo den pintura abstracto inspira riba paisahe di Aruba.

Despues di a regresa Aruba den añanan 1980, Stan Kuiperi a participa den mas di 60 exposicion y 5 bienal di arte local y internacional. Esaki banda di su carera full-time di Maestro di Educacion di Arte Visual. Un cantidad di publicacion local y internacional a trata su obra artistico. Ela ricibi e condecoracion Ridder in de Orde van Oranje-Nassau pa su trabou artistico y su dedicacion general di varios decada na desaroyo y educacion cultural-artistico na Aruba.